

欽
定
全
唐
文

欽定全唐文卷九百十五目錄

處玉璿

大唐眾義寺故大德敬節法師塔銘

并序

元朗

招元覺大師山居書

靖彰

永泰寺碑

德宣

隋司徒陳公捨宅造寺碑

法海

六祖大師法寶壇經畧序

欽定全唐文卷九百十五

處玉璿

處玉璿開元時沙門

大唐眾義寺故大德敬節法師塔銘

并序

夫王而作則者大雄見而遄歸者大寶聲被周漢義逸齊
梁學比稔毛富如崑玉道飾其行俗賞其音或內祕靈知
或外見常迹起伏不拘於

闕一字

一代出沒所謂於須臾孰有

以兼之公得其門也惟大德俗姓盧諱敬節范陽人也祖
尚書遠葉棲志邱園父樂司徒季英閒居遁世愍於稭子

過以羣流放令出家不從文秩上可以益后下可以利人
不累莊嚴足陪淨藏令投虔和上受業年甫十歲日誦千
言維摩妙高飛峯口海法華素月吐照情田奏梵音以雲
揚感神明而雷激厭俗之垢王澤遐沾落髮之貞天魔爲
懼至二十九入道具臘寺舉都維那二十載清拔僧務造
長廊四十間不日克就光嚴帝宇粹表祇園結棟凌霞飛
檐振景士拜左顧靡怯風搖人謁右旋非憂雨散亦嘗柔
外以定定力振振順中以如如心奕奕笑法橋而虹斷切
義舫之神移莫不悼哉何嗟及矣以開元十七年七月十

五日終於私房春秋七十有五窆於神和原律也門人處
玉璿延阼等念松迴茂仰蕙遙芬悵頽景之不畱恨驚風
之早落師魂遠何至資影痛何孤恐岸成川起塔崇禮式
爲銘曰

迹滿三界神放六通教令遞囑德位常融轉延象世運及
都公木選寒柏山寶舒虹行高獎下言貴居忠俗承遠聲
色道洽化無窮水搖魚徙動人斷院悲空日影何旋北山
陰遽已東荒郊悲慘慘烟氣亂葱葱式作營於妙塔用表
列於仁雄樞窆歸於泉壤性遙拔於樊籠挫一代之濁命

流千古之清風

元朗

元朗字慧明俗姓傅氏東陽烏傷人大士六世孫浦江江夏太守拯公之後九歲出家如意元年勅度清泰寺天寶十三年卒年八十二

招元覺大師山居書

自到靈溪泰然心意高低峯頂振錫常遊石室巖龕拂手
宴坐青松碧沼明月自生風埽白雲縱目千里名華香果
蜂鳥銜將猿嘯長吟遠近皆聽鋤頭當枕細草爲氍毹上

崢嶸競爭人我心地未達方乃如斯倘有寸陰願垂相訪
靖彰

靖彰天寶中靈昌郡龍興寺沙門

永泰寺碑

觀夫聖應無方等曜靈之流萬象覺海元曠若溟渤之含
百川凝然居眾妙之先煥矣處有空之際於是慈光西燭
慧液東飛廣開權實之門爰啟布金之義粵茲寶界創自
後魏正光二載卽孝明帝之賢妹也乃居寵若驚克修雅
志確乎出俗入道爲尼以誠信有徵勅爲置明煉之寺兼

度士庶女等百有人矣頃遇周武不敏正教凌夷至隋氏
開皇重加修復又度尼廿一人以崇景福暨有唐貞觀三
載議將尼寺居山慮恐匪人侵擾勅令移額於偃師縣下
置此因廢焉至神龍二載七月廿五日有嵩岳寺都維那
僧道瑩奏聞此故寺依山帶水形勝幽棲不假多工便堪
居住伏惟故永泰公主器韞沖和承規帝闕庶增瓊萼冀
保瑤枝何圖厭代辭榮遷神遂遠二聖痛金娥之殞兆人
興玉碎之悲凡厥有情孰不傷悼至論潛祐必賴薰修伏
望天恩爲永泰公主於前件故伽藍置寺一所請以永泰

爲名特望度僧二七人庶使福資冥路竊惟聖不孤運會緣必興建寺立僧實由於此自茲以降暨乎至今亦有別勅配居或牒兩京名德翼翼清衆五十餘人咸以軌範端融心澄海月鵝珠育物禮誦無虧常懷報國之恩庶願福增皇祚千佛二古塔者昔明煉之所起亭亭四照巖巖搖空龕室玲瓏重光迴映其間大率堵坡者隋仁壽二載之所置文帝應命感異稀奇忽得舍利一餅雪毫燦爛火焚益固擊之逾明乃詔天下梵場令起塔供養爲蒼生之祈福也規制妙絕神工未方永鎮檀林以昭盛烈東有兩支

提者昔寺主道瑩上座崇敬遺教門人之所造也二長老
僧基國寶振古超今息化歸心法俗追悼故起斯塔前門
樓浴室食堂經藏者卽大德曇陟律之所構也律師宿智
圓明知微察物少編僧錄風骨天然精持大乘元通數部
不住無相兼崇有爲沙門思悟者心燈獨知跡無住處諸
佛遺旨必能竭其筋力諸魔動念必不愛其死生乃跋涉
山川樸斲杞梓食堂之力頗有助云九級浮圖者比丘眞
一敬爲故兄寺主眞藏之所建也禪師積德累仁果曾慈
惠玉昆金友俱離塵籠弟子沙門志堅及陳畱郡封禪寺

都維那僧希宴等敬爲和上樹茲景業寺主絢彩凝華心
鏡虛朗再成寶殿重立尊儀但有闕遺盡加營葺并鑄大
銅鐘一口重四千斤函二十石裝飾嚴麗備物維新金容
將滿月齊暉玉相與日輪爭曜簷宇四繞迴廊復周蹬道
凌虛縣階數帀風鈴夜警聲聲流解脫之音曉梵朝吟一
一讚苦空之偈嘉木繁植祥花接異以恒春高柳垂幡喬
松結蓋而雲際前寺主道演前上座智光前都維那僧元
順皆體道歸一異本同源逍遙林泉躡履雲壑復有沙門
法意敬一等至樂大乘沈心不二一日必葺當賈勇而行

諸六時精勤縱力極而不廢其寺也嵩巖右脇龍津左傍
前眺案崗萬公居後地形澄迥幽磎對靈鎮之臺山勢巍
峩峩峯頂與層巒俱峻昔跋陲三藏縣記此方人安衆和福
利彌廣時上座明信寺主道峻都維那敬一等普操履霜
潔動成紀綱德義相資同知寺任但恐三輪一轉海際塵
驚若不刊勒貞璆何以表之靈跡靖彰內慚深定外謝多
聞敢違宿心昧揚休烈其詞曰

佛性微遍含識隱顯自在兮無量力開祕藏耀無疆寶刹
巖凝兮仙路長韻慈鐘震縣極警衆沈昏兮清閭域光勝

宅啟津梁淨彼地獄兮與天堂昔明煉今永泰跋陀遠記
兮斯爲大刻珍石炳微言曠代昭宣兮萬祀傳

德宣

德宣天寶中龍興寺沙門

隋司徒陳公捨宅造寺碑

觀夫二儀之大也不能免天傾地裂之災三光之明也不
能免日薄星迴之變非夫圓明鍾覺利見大雄飛觀眞峯
高視鐵圍之外澄襟性海獨瑩珠泉之底者其孰能置四
生於不動之國濟八苦於無明之河祕密成伊演龍藏於

三千世界童蒙求我運牛車於五百由旬所以太子迴心
捨宮殿臣妾商人合掌奉眞珠琉璃給孤獨園一家之造
精舍瑯琊別產兩宅之入伽藍大矣哉其誰繼之我司徒
陳公之謂也公諱杲仁字世威其先豫州潁川人也十七
代祖寔爲太邱長六世祖陳武帝經天緯地之功與乾坤
而合道濟俗安人之德共日月而齊明家於長城故復爲
晉陵人也祖暉字元皎陳羽林郎將萬戶千門警夜巡晝
旌旗曳日朝馳楊柳之街鐘鼓沸天夕衛鴛鴦之殿別勅
授洪州建昌縣令戴星按俗靡草臨人澤被春滋愛融冬

日花藏野雉戀錦化而長馴煙渚庭鸞懷磬聲而率舞父
諱季明字元煥陳江州司馬兼嶺南道採訪使尋拜給事
中朱紱題輿按三江而寫鑒皇華按節踰五嶺而騰驤出
揚使德之清入掌王言之重公器局宏偉風神灑肅年八
歲能文章隨父任在都宅與吏部侍郎陰鏗接住鏗家置
學就博士授孝經尚書以夜繼晝口不輟誦鏗曰吾之東
家某復生矣年十三讀史至司馬相如題橋之言歎曰大
丈夫富貴由天窮達在命使吾有壽亦當自致青雲年十
八州將舉秀才送上臺對策於玉階舉朝稱之曰使孫宏

之文李廣之武與子同時則並驅連衡矣帝曰朕與兒俱太邱之後家風不墜復見於茲特授監察御史尋遷江南道巡察大使臺中繡服馳驄馬而時來陌上朱輪按豺狼而不去大業五年三月長白山大洞內有狂寇數萬公奉詔平之授秉義尉尋授朝請大夫九年正月奉詔平江寧樂伯通叛徒十萬授銀青光祿大夫十三年奉詔平東陽婁世幹賊徒二十萬隋主嘉之召公面見拜大司徒賜麗妹二十人細馬五匹粟千斛綵五百段對數休命輔佐王官金印紫章照彤庭而赫奕綵羅紅粟填帑藏以崔嵬屬

隋季分崩天下喪亂洎我大唐之有天下也日月懸而天地再造厯數在而車書一統聖人御宇萬國來朝奉詔詢江東晉陵耆老隋故司徒陳杲仁身有八絕可得聞乎耆老逡巡而稱曰言八絕者一忠二孝三文四武五信六義七謀八辨梁大同中義興縣與晉陵競太湖田數年不決太守命公斷之咸悅服焉建始中長白山叛徒引及朝貴公奉詔推鞠繩黥顯然而知鑑逾明鏡直若朱弦梁末斷太湖之田是非明白陳初劾長山之賊真偽糾分兩造平反聲馳省閣片言折中譽出鄉閭公之忠也公事後親親

病須肉時屬禁屠肉不可致公乃割股以充羹刺血寫法
華經爲先妣修福孝深骨立情愼色難豈惟孝悌之有餘
亦迺津梁之莫大公之孝也初公選在都會吏部侍郎陰
鏗出使西蜀中書令江總北巡徐泗傾都餞於新亭時公
奉詔作大使西巡序及北征賦思逸懷蛟才高倚馬入江
寫月光含夷水之珠詞花飛葉綵麗蜀城之錦公之文也
而邊寇不寧戎馬屢駕百川潛討三畧陰謀巨力取而拔
山功歸第一神鑕來而破的中必疊雙兕徒與惡葉同飄
逆黨共春冰一泮公之武也豁達大度宏澄春陂勝必推

人失乃向已官祿給其粟帛盡散親朋皇恩加其僕馬併
均昆弟公之義也旣忠且信十室彰夫子之名密契深期
千里命巨卿之駕確乎不拔惕若有孚公之信也攻城畧
地祕策權宜進楚食而離范增奪胡鞍而輸李廣公之謀
也折角無先共朱雲而竝操懸河不竭與郭象而連詞公
之辨也帝曰俞雖曲逆辯六奇之計陳王懷八斗之才論
功揆德莫之加也芳名馳於萬古壯志立於三吳陳書雖
著其高名唐史未編其實錄勅史官宜書直筆大業中天
門公沈法興起義兵於湖州聞公名遠來投公是知龍門

之前涸魴搖腮而競集鵲巢之側維鳩拂羽而爭來法興
欲割據常州詐結父子之義時逆人李子通屯集數萬鎮
在江北懼公之威不敢輒渡法興潛謀詐稱疾亟公往問
疾乃覺中毒走馬而歸公素與高僧凜禪師著塵外之交
法師尋與受菩薩戒付囑張軫二夫人所居之華第竝道
南兵仗院竝施爲僧伽藍名杜業寺是郡東南三十五里
公之別業紅沼夏溢芰荷發而惠風香綠田秋肥霜露降
而嘉禾熟竝捨入景星寺言訖而終雖幽魂冥冥梁木斯
壞而生氣凜凜高風尚存功可勒石食堪配廟故夫子文

鍾嶺南

疑

骨喪而名畱太伯吳門文身無而道在况公神

異越於昔賢左遮江關東壓海口使天無流疫路不拾遺
江上伏鬼神若稱官勢郡中散牛馬以付羅衡四民銜
護之恩百姓荷扶持之力其寺明政三年六月之所置也
初名杜業後改爲宏業因廟諱復改爲福業嗚呼公以武
德二年歲次庚辰五月十八日而薨享年七十二厥後薨
辰精舍坊闔答公之恩飯僧供佛皓月有晃香燈無虧亦
由晉感子推之辭楚懷屈原之德懋哉垂裕貽厥後昆公
之長子坦廣府士曹次子頽洪州司法難兄難弟如珪如

璋弄雙珠之明匡二天之化額之子璉不餌葷血早悟苦
空得菩薩心有神仙壽年九十一卒於家璉之子光允雅
繼清風棲心金地德必有鄰同聲相應與孝門岑庭結交
二人同心鑄文殊菩薩像用鐵千觔又勸同志之士鑄普
賢菩薩像體均前種相好圓明寫妙德之奇姿移寶威之
真跡太守劉公同昇兼江東道採訪使四岳分憂九州共
理玉壺冰寫讓心骨之清紅樹花開怯文章之秀長史歐
陽公司馬孫公竝望重題輿才高展驥親紆化鶴共佐懸
魚縣令何公共挾天下之才共臨江縣未搏風於九霄且

震雷於百里福業寺綱維徒眾等竝貞諒不拔維持有聲
莫不道俗相率誠命於予式歌文武之功共紀招提之業
於戲年更事遠懼馨香之闕遺詢諸碩才備茲景行勉抽
鄙思乃爲銘曰

昭哉烈士兮昂昂擅波蜜兮自強捨一家兮良田甲第成
三寶兮佛土僧坊生則封侯兮傑出歿而配廟兮名揚聖
后兮聰明光宅何奸寇兮殘剝遐方明神八絕兮宏祐飛
將一埽兮銷亡悲盛績兮江南蕪沒樹豐碑兮海內昭彰

法海

法海字文允俗姓張氏丹陽人一云曲江人出家鶴林寺
爲六祖弟子天寶中預揚州法慎律師講席

六祖大師法寶壇經畧序

大師名惠能父盧氏諱行瑫母李氏誕師於唐貞觀十二
年戊戌二月八日子時時毫光騰空異香滿室黎明有二
異僧造謁謂師之父曰夜來生兒專爲安名可上惠下能
也父曰何名惠能僧曰惠者以法惠施眾生能者能作佛
事言畢而出不知所之師不飲乳夜遇神人灌以甘露旣
長年二十有四聞經悟道往黃梅求印可五祖器之付衣

法令嗣祖位時龍翔元年辛酉歲也南歸隱遯一十六年
至儀鳳元年丙子正月八日會印宗法師宗悟契師旨是
月十五日普會四眾爲師薙髮二月八日集諸名德授具
足戒西京智光律師爲授戒師蘇州慧靜律師爲羯磨荆
州通應律師爲教授中天耆多羅律師爲說戒西國蜜多
三藏爲證戒其戒壇乃宋朝求那跋陀羅三藏勅建立碑
曰後當有肉身菩薩於此收戒又梁天監元年智藥三藏
自西竺國航海而來將彼土菩提樹一株植此壇畔亦預
誌曰後一百七十年有肉身菩薩於此樹下開演上乘度

無量衆真傳佛心印之法主也師至是祝髮受戒及與四

衆開示單傳之法旨一如昔讖

以天監元年壬午歲考至唐儀鳳元年丙子是得一

百七十年次年春師辭衆歸寶林印宗與緇白送者千餘人

直至曹溪時荊州通應律師與學者數百人依師而往至

曹溪寶林觀堂宇湫隘不足容衆欲廣之遂謁里人陳亞

仙曰老僧欲就檀越求坐具地得不仙曰和尚坐具幾許

濶祖出坐具示之亞仙唯然祖以坐具一展盡罩曹溪四

境四天王現身坐鎮四方今寺境有天王嶺因茲而名仙

曰知和尚法力廣大但吾高祖墳墓竝在此地他日造墓

慧靈

仁王護國經道場念誦軌儀序

良賁

奉勅造疏通經成進上表

辨才

心師銘

昔眞

佛頂尊勝陀羅尼幢銘

乘如

謝修戒壇表

景淨

景教流行中國碑

至咸

雲麾將軍河南府押衙張府君夫人上黨樊氏墓

誌銘

并序

眞言

大唐金剛般若石經記

潛眞

新譯文殊師利菩薩佛刹莊嚴疏奏

良秀

奉勅造波羅蜜經疏進上表

欽定全唐文卷九百十六

新文豐出版社藏書

覃素

覃素天寶中宣化寺沙門

宣化寺幢銘

并序

上之寶幢者粵若故尼大德諱元真俗本姓李長安人也

闕改四分毗尼每至朗月長宵闕大悲之祕旨洎永泰

元年闕自一居花宮闕餘載精究闕住持遐邇欽風

士庶闕月十一日示滅於宣化寺之精闕六十二僧夏

卅二闕即寂早歲聯師情深水乳結菩提勝侶嗟存歿而

俄乖弟子闕曰

上闕子燈不絕今傳祕旨悲法舟今沈逝水建茲幢兮播芳美

思莊

思莊天寶中大溫國寺主

實際寺故寺主懷惲奉勅贈隆闡大法師碑銘并序

昔吾師因地求真眾魔紛繞果到成佛龍天捧圍自作鎮靈山法躬靡易告滅雙樹示跡倫凡微言不傳慧燭潛照屆夫歲邁千秋時淹五濁欲海騰沸邪山紛紜於是釋防

東逝爰稱兆應漢夢西通方崇像法或青眸接軫競扇元
風或白足相趨爭開佛日至欲繼前賢之令軌爲後進之
康衢燭照重昏慈舟苦派人能宏道斯之謂歟法師諱懷
惲俗張姓南陽人也遠祖因宦播遷京兆廿一代祖安晉
丞相襲爵鴻臚公高祖融守黃門郎遷太子庶子祖英唐
解褐太常太祝襲爵天平公尋轉吳王祭酒握蘭奏位清
陪雅列法師聰敏爲其性相慈善資其風骨母常山夫人
樂姓降胎之月不味羶腥載誕之辰情欣禁戒暨年登卅
歲特異諸童或焚葉爲香或聚沙爲塔雖飛軒繡轂未嘗

留步月宇香樓怡然忘返高宗天皇大帝乘乾撫運出震
披圖虛已求賢明敷待士總章元載夢覩法師倏降綸言
遠令虔辟於是臨丹檻邇青蒲廣獻眞誠特蒙褒讚帝乃
親授朱紱令處鳳池之榮師乃固請緇衣願託鸚鵡林之地
奉勅於西明剝落善來忽唱惡業疑銷旣挂三衣俄陪四
衆翹勤遽積思五分而非遙精苦逾深想三祇而未遠時
有親證三昧大德善導闍梨慈樹森疎悲花照灼情祛多
漏擁藤井於蓮臺叡化無涯驅鐵圍於寶國旣聞盛烈雅
締師資祈解脫規發菩提願一承妙旨十有餘齡祕偈眞

乘親蒙付屬自惟薄祐師資早喪想遺烈而崩心顧餘恩
而兩面爰思宅兆式建墳塋遂於鳳城南神和原崇靈塔
禮也其地前終峯之南鎮後帝城之北里歌鐘沸出移上
界於陰門泉流激灑背連河於陽面仍於塔側廣構伽藍
莫不堂殿崢嶸遠模忉利樓臺岌業直寫祇園神木靈草
凌歲寒而獨秀葉暗花明逾嚴霜而靡悴豈直風高氣爽
聲聞進道之場故亦臨水面山菩薩全真之地又於寺院
造大窣堵坡塔周迴二百步直上一十三級或瞻星揆務
或候日裁規得天帝之芳蹤有龍王之祕跡重重佛事窮

鷲嶺之分身種種莊嚴盡崑邱之異寶但以至誠多感能
事冥資故能遠降宸衷令賁舍利計千餘粒加以七珍函
笥隨此勝緣百寶幡花令興供養則天大聖皇后承九元
之眷命躡三聖之休期猶尚志想金園情欣勝躡或頻臨
淨刹傾海國之名珍或屢訪炎涼捨河宮之祕寶法師誠
盈而散竝入擅航法師業行高遠利益繁多故得名振九
重芳盈四部奉永昌元年勅徵法師爲寺主於是綱紀僧
徒規模釋族緇門濟濟戒德峻而彌堅紺宇誵誵常住豐
而更實猶是才稱物寶道爲時尊知與不知仰醍醐於句

偈識與不識詢法乳於波瀾法師以慈誘內懷敷揚外積
冀傳聖旨用酬來望每講觀經賢護彌陀等經每數十遍
夫我域者扇激風火嬰抱結漏系諸生滅止無常之短期
研乎事真攀不亟之虛眈若不乘佛願力託質淨方則恐
淪溺長往清昇永隔於是言論之際懇勸時眾四儀之中
一心專念阿彌陀佛願乘此勝因祈生淨域又以般若神
呪能令速證菩提彌陀佛名亦望橫超惡趣諸餘妙典雖
竝積心臺於此勝緣頗徧遊智府嘗誦大般若呪向盈四
萬又誦彌陀真偈十萬餘遍理復使精真厥想念雖微而

必就二三於行功唐捐而靡得豈直諸佛現前神人捧錫而已矣師爲諸重擔攝爾羣生舉洪灼於耶山掉寶航於見海悲夫娑婆國中人多弊惡雖復珍臺寶界因勝侶而歸心至欲逸翥遐征藉良緣而克進敢憑此義爰發誠心於是廣勸有緣奉爲九重萬乘四生六趣造淨土堂一所莫不虬棟凌虛虹梁架迴丹楹赭日青瑣延風無春而返井舒花不暝而重簷積霧於是神螭戾止遠鎮瓊階寶鳳來儀還陪桂戶雕甍畫拱之異窮造化之規模圓璫方鏡之奇極人天之巧妙又於堂內造阿彌陀佛及觀音勢至

又造織成像并餘功德相好奇特顏容湛粹山豪演妙若
照三千海目摘華如觀百億或因繒命采有慈氏之全身
或散札馳芳得憂填之逸思何獨如來自在疑降上界之
魔故亦菩薩懽怡似救下方之苦夫以宅生者心心榮則
生喪栖神者志志擾則神亡然菩薩以濟物捐軀上善以
遺形徇節法師情存拯救式奉殷繁汲引雖曰忘懷形質
焉能靡累於是忽嬰風瘵病與時侵靈藥勿痊胚器俄逝
豈夫八林齊白我佛稱於寂滅梁木其壞吾師等於死生
以大足元年十月廿二日神遷春秋六十有二臨終之際

正念無虧顏色怡悅似有瞻矚北首面西奄然而化悲夫
烈烈歲陰蒼蒼天色乾兮何負殲我惟良業也何孤喪茲
賢哲豈直悲盈四部嗟鹿苑之荒涼抑亦哀悼兩宮痛蜂
臺之閭寂猶是俯迴天睠載紆仙豪遠降恩波爰加制贈
奉神龍元年勅實際寺主懷惲示居三界遠離六塵等心
境於虛空混榮枯於物我棟梁紺宇領袖緇徒包杖錫之
規模躡乘杯之懿躅雖已歸寂滅無待於褒揚然寵洽友
于無忘於緝禮可贈隆闢大法師主者施行上人以至德
聿修良因果著故得天降成烈用讚芳規追遠慎終生榮

死贈足可光輝淨刹歷塵芥而長存旌賁元門共河山而
永久弟子大溫國寺主思莊等竝攀號積慮哀慕居懷嗟
覆護而無時仰音顏而靡日猶恐居諸易遠淑善湮沈敬
想清徽勒茲元琬詞曰

娑婆種覺賢劫能人三祇殄妄五分析真卽相離相非身
是身猶施慧棧廣濟迷津其一十方化備雙林滅度三界空

虛四生哀慕正教旣隱微言遽歟式啟先哲用資後悟其二

芳猷廣被至烈彌殷青眸演聖白足成真遠導芻芥遐宣

墨塵元門不絕代有其人其三猗歟令德遠嗣前英聲高四

部譽重三明慈周有識智契無生法雲葉落道樹滋榮

其四

豈圖宿殃師資遽亡乾兮何負殲我惟良徒嗟授几空念

傳香非夫勝緣孰答恩光

其五

邈矣垌野慈顏壙側敬發誠

心爰憑淨域真容湛粹樓臺巋嶷希此善根遠酬明德

其六

吉藏

吉藏族姓安氏其先安息人祖世避仇移居南海後遷金陵七歲出家隋開皇末詔住慧日寺唐初勅住延興寺武德六年卒年七十五

上元宗遺表

藏年高病積德薄人微曲蒙神散尋得除愈但風氣暴增
命在旦夕悲戀之至遺表奉辭伏願久住世間緝寧家國
慈濟四生興隆三寶

神會

神會俗姓高氏襄陽人幼投本郡國昌寺依顓元禪師出
家開元八年勅住南陽龍興寺天寶二年勅住荊州開元
寺肅宗朝勅入內供養又勅住西京河澤寺上元元年卒
年九十二

顯宗記

無念爲宗無作爲本眞空爲體妙有爲用夫眞如無念非
想念而能知實相無生豈色心而能見無念念者卽念眞
如無生生者卽生實相無住而住常住涅槃無行而行卽
超彼岸如如不動動用無窮念念無求求本無念菩提無
得淨五眼而了三身般若無知運六通而宏四智是知卽
定無定卽慧無慧卽行無行性筭虛空體同法界六度自
茲圓滿道品於是無虧是知我法體空有無雙泯心本無
作道常無念無念無思無求無得不彼不此不去不來體
悟三明心通八戒功成十力富有七珍入不二門獲一乘

理妙中之妙卽妙法身天中之天乃金剛慧湛然常寂應
用無方用而常空空而常用用而不有卽是眞空空而不
無便成妙有妙有卽摩訶般若眞空卽清淨涅槃般若是
涅槃之因涅槃是般若之果般若無見能見涅槃無生能
生般若涅槃若名異體同隨義立名故云法無定相涅槃
能生般若卽名眞佛法身般若能建涅槃故號如來知見
知卽知心空寂見卽見性無生知見分明不一不異故能
動寂常妙理事皆如如卽處處能通達卽理事無礙六根
不染卽定慧之功六識不生卽如如之力心如境謝境滅

心空心境雙亡體用不異真如性淨慧鑒無窮如水分千
月能見聞覺知見聞覺知而常空寂空卽無相寂卽無生
不被善惡所拘不被靜亂所攝不厭生死不樂涅槃無不
能無有不能有行住坐卧心不動搖一切時中獲無所得
三世諸佛教旨如斯卽菩薩慈悲遞相傳受自世尊滅後
西天二十八祖共傳無住之心同說如來知見至於達摩
屆此爲初遞代相承於今不絕所傳祕教要藉得人如王
髻珠終不妄與福德智慧二種莊嚴行解相應方能建立
衣爲法信法是衣宗唯指衣法相傳更無別法內傳心印

印契本心外傳袈裟將表宗旨非衣不傳於法非法不受
於衣衣是法信之衣法是無生之法無生卽無虛妄乃是
空寂之心知空寂而了法身了法身而眞解脫

不空

不空梵名阿目佉跋折羅北天竺婆羅門族幼隨季父至
東土年十五師事金剛智三藏後附崑崙舶至師子國天
寶五載齋密藏還京師賜號智藏厯元宗肅宗代宗三朝
皆爲灌頂國師永泰元年詔特進鴻臚卿加號大廣智三
藏九年勅加開府儀同三司封肅國公是年卒勅贈司空

謚大辨正廣智三藏和尚

進翻譯佛經表

爰自幼年承事先師大宏三教和尚二十有四載稟授瑜伽法門後遊五天尋求所未授者外諸經論更重學習凡得梵本瑜伽真言經論五百餘部奉爲國家詳譯聖言廣崇福祐天寶五載却至上都奉元宗皇帝恩命於宮內建立灌頂道場所齋梵經盡許翻譯及肅宗皇帝配天繼聖特奉綸音於內道場建立護摩及灌頂法又爲國譯經助宣皇化其所譯金剛灌頂瑜伽法門是成佛速邪之路其

修行者必能頓超凡境達於彼岸餘部真言諸佛方便其
徒不一所譯諸大乘經典皆是上資邦國息滅災厄星辰
不愆風雨順序仰恃佛力輔成國家謹續集前後所翻譯
自開元至今凡一百一卷七部以聞

譯大聖文殊師利菩薩讚佛法身禮序

皇帝以深仁馭宇大明燭物普灑甘露沃蕩黎元不空叨
沐聖慈濫當翻譯當奉恩命令集上都義學沙門良賁等
一十六人於內道場翻仁王護國般若及大乘密嚴等經
畢願讚揚於至覺冀介福於聖躬竊見大聖文殊師利菩

薩讚佛法身經據真梵本有四十禮先道所行但惟有十
禮於文不備歡德未圓恐乖聖者懇誠又闕羣生勝利不
空先有所持梵本竝皆具足今譯流傳庶裨宏益其餘懺
悔儀軌等竝如舊本此不復云於時唐永泰元年維夏四
月也

大乘瑜伽金剛性海曼殊室利千臂千鉢大教王
經序

大唐開元二十一年歲次癸酉正月一日辰時於薦福寺
道場內金剛三藏與僧慧超授大乘瑜伽金剛五頂五智

尊千臂千手千鉢千佛釋迦曼殊室利菩薩祕密菩提三
摩地法教遂於過後受持法已不離三藏奉事經於八載
後至開元二十八年歲次庚辰四月十五日聞奏開元聖
上皇於薦福寺御道場內至五月五日奉詔譯經卯時焚
燒香火起首翻譯三藏演梵本慧超筆授大乘瑜伽千臂
千鉢曼殊室利經法教後到十二月十五日翻譯將訖至
天寶一年二月十九日金剛三藏將此經梵本及五天竺
阿闍黎書竝總分付與梵僧目叉難陀娑伽令送此經梵
本并書將與五印度南天竺師子國本師寶覺阿闍黎經

今不迴後於唐大厯九年十月於大興善寺大師大廣智
三藏和尚邊更重諮啟決擇大教瑜伽心地祕密法門後
則將千鉢曼殊經本至唐建中元年四月十五日到五臺
山乾元菩提寺遂將舊翻譯唐言漢音經本在寺至五月
五日沙門慧超起首再錄寫出一切如來大教王經瑜伽
祕密金剛三摩地三密聖教法門述經祕義諸佛出世應
物隨形志求者智鏡元通念之者無幽不入根緣感赴必
藉此經登菩提山除去邪執契傳二密得究瑜伽祕要法
門窮理微妙身口意業用智修持戒定慧學顯現通達證

如來地以信爲首乘般若舟速超彼岸今述曼殊之德靈
跡殍伽聖覺無方神力潛運以多塵劫悲願不住菩提一
主無二尊見爲菩薩自茲金色世界來其忍土之中於清
涼之山導引羣品而卽現燈現雲及萬菩薩信生奇特現
光現相人身皆發正智爲因利益三世蒼生有趣願到菩
提次畧舉經都題序目大乘瑜伽金剛性海總攝一切法
金剛五頂五智尊現大聖曼殊室利菩薩顯千臂千手千
鉢化千釋迦灌頂曼荼羅一切諸佛修證如來金剛菩提
具足一切法入毗盧遮那五金剛界聖智圓通入如來佛

心三密三十支金剛智鏡聖道性海故

飛錫

飛錫天寶初游京師住終南紫閣峯草堂寺復住大聖千福寺永泰元年詔於大明宮內道場同義學沙門良賁等十六人譯經充證義

楚金禪師碑

潭碧千丈無隱月容松青萬嶺莫靜風響夫德充於內而聲聞於天者有以見之於禪師矣禪師法諱楚金程氏之子本廣平郡今爲京兆之藍屋人焉祖宗閥閱存而不論

母渤海高氏夜夢諸佛是生禪師真可謂法王之子者也
行素顏玉神和氣清七歲諷花經十八講花義三十構多
寶於千福四十入帝夢於九重上覩法名下見金字詰朝
使問罔不有孚聲沸江海豈惟京輶於是傾玉帛引金繩
千梁攢空一塔聳漢迴廊飛閣無不創焉風起而鈴鳴半
天珠懸而月生絕頂清淨眼耳駿奔香花度如恒沙而無
所度者有之矣嘗於翠微悟真捫蘿靈趾乃曰此吾棲遁
之所遂奏兩寺各建一塔咸以多寶爲名度緇衣在白雲
昭其靜也矧夫心同琉璃思出常境工人梓匠僉訝生知

毗首所未悟班輸所愕視若然則浮圖之化髻珠之教風
靡千界皆禪師之力豈止金丹五天而已哉禪師雲雷發
空谷之響金石吐鏗鏘之音吟詠妙經六千餘篇寶樹之
下髻髻見於分身靈山之上依稀覲於三變心無所得舌
流甘露瑞鳥金碧棲於手中天樂清泠奏於空際凡諸休
應皆不有之乃曰法本無名焉用彼相長而不宰其在茲
焉若非法華三昧稟自衡陽止觀一門傳乎台嶺安能迂
象王之法駕迴聖主之宸睠承明三入宏道六宮后妃長
跪於御筵天花每散而不著元宗題額肅宗賜幡鵲返雲

中住香樓而不下龍蟠天上挂金刹而常飛玉衣盈箱璽
書滿篋寫千經滴瀝而垂露答萬乘渙汗之渥澤夔龍貂
冕下黃道而整襟隱逸高僧入青蓮而扣寂微塵知識如
從百城而至無邊勝士若自千華而來豈榮冠於一時亦
庶幾於佛在也雖林茂鳥歸人高物向澄渟天地之境委
曲虛空之姿無來乃來不往而往所作已訖吾將去乎有
夢綵座前迎諸天獻菓粵以乾元二年七月七日子時右
脇薪盡火滅雪顏如在昭乎上生於安養之國矣享齡六
十二法臘三十七天子憫焉中使弔焉尋勅驃騎大將軍

欽定全唐文

卷九百十六

飛錫

十四

朱光暉監護卽以其年八月十二日法葬於長安城西龍道原法華蘭若塔之

闕

禮也於戲禪師齡年詔度初配龍

興中歲觀心閉關千福罷玉柄葆天光悟炎宅清涼駕一乘獨運乃夢塔從地涌因用模焉今之所製抑有由矣至若神光熠熠於其顛聖燈明滅於其下畫普賢則舍利飛筆繪羣釋乃卿雲澹空頂中之血刺寫經王衣裏之珠指呈醉士當其無有其用不立心境同乎大通彼五色之相宣我摩尼之何有豁如也縑纈皮革多由損生屬徒衣布寒加艾納慈至也若乃降龍之鉢解虎之杖蓮花之衣甘

露之飯凡諸法物率多勅賜不住於相咸將施焉室不貯
於金錢堂每流乎香積澹然閑住爲天人師允所謂利見
於大雄釋門之亞聖者也又曰吾自知終於六十有二矣
爾曹誌之以其言驗其實宛如也噫八部增怛萬國同哀
有詔令茶毗遵天竺故事於是金棺閉香木燒玉兔馴白
鶴唳霧咽松欒風淒郊垆月飛青天無照元夜法花弟子
當院比丘慧空法岸浩然等表妹萬善寺上座契元萬善
寺建多寶塔比丘尼正覺資敬寺建法華塔比丘尼奔叱
利等眞白凡數萬人悲化城之不住痛寶所而長往貝葉

翻手孰指宗通金磬發林誰宣了義以予分座御榻同習
天台爰託斯文鏤之眞石式揚眞古敢不銘云

天上雲飄海中日出如何落照大明奄失蓮花之外別有
蓮花寥廓之表又逢寥廓法離去來道無今昨松門一塔
今誰爲寂寞寂而常照死而不亡其響彌高兮其德彌彰
白鶴雙雙飛香郁郁明月旣出更無星宿

大唐眞化寺多寶塔院故寺主臨壇大德尼如願

律師墓誌銘

大厯十年歲次乙卯五月廿九日律師薨於長安眞化寺

之本院律師法諱如願俗姓李氏隴西人也申公之裔簪
裾之盛眞豈寶乎律師天生道牙自然神秀十一詔度二
十具圓彌沙塞律其所務也分氎之義不殊折金之理斯
在律師僅登十臘聲實兩高邀臨香壇辭不見允望之儼
然卽之溫然其慧也月照千潭其操也松寒萬嶺乃曰威
儀三千吾鏡之矣度門八萬復焉在哉遂習以羅浮雙峯
無生之觀位居元匠矣我皇帝纂聖君臨千佛付囑貴妃
獨孤氏葛覃蘊德十亂匡時受道紫宸登壇黃屋因賜律
師紫袈裟一副前後所錫錦綺繒帛凡數千疋以旌其高

璨乎盈庭了無是相道何深也由此勅書壘篋中使相望
御馬每下於雲霄天花屢點於玉砌締構多寶塔繕寫蓮
華經環廊繚緼金剎熠耀額題御札光赫宇宙皆吾君之
特建亦貴妃之爲國宏哉噫律師擲鉢他方應遽還於靜
室散花上境何便住於香天顏貌如生若在深定曲肱右
脇湛然已滅春秋七十六法夏五十六具以上聞皇情憫
焉中使臨弔賻贈之禮有加常等律師累聖欽若三都取
則意澹江海心閑虛空而今而後恐難繼美於戲六宮誰
授其髻寶八部孰示於衣珠覺路醒而却迷人花茂而還

落哀哉弟子長樂公主與當院嗣法門人登壇十大德尼
常真勅賜弟子證道政定證果寺大德凝照惠照凝寂悟
真資敬寺上座洪演寺主孝因律師真一遠塵法雲寺律
師遍照等凡數千人則懿戚相門愛道花色而爲上首忽
喪宗匠如觀鶴林卽以其年七月十八日奉勅法葬於長
安城南畢原塔之

闕一字

禮也素幡悽於道路丹旒慘於郊

局式揚國師敢爲銘曰

紫袈裟者彼何人已了如來清淨身登壇不向明光殿去
去應超生死津

慧靈

慧靈莊嚴寺沙門大中七年賜紫勅補新寺上座後預代宗永泰中參譚證義年百餘歲

仁王護國經道場念誦軌儀序

我皇帝聖德廣運仁育羣品亦旣纂厯吹大法螺利梵言之輕重警迷途之耳目偉矣哉迺大興善寺大廣智三藏不空與義學沙門良賁等一十四人開府魚朝恩翰林學士常袞等去歲夏四月於南桃園再譯斯經至秋九月詔資聖西明兩寺各五十人百座敷闡下紫微而千官作禮

經出內而萬姓觀瞻遂感慶雲呈瑞嘉氣浮空左右兩階
威儀整肅幡華前引音樂後隨內外咸歡京城共喜阡郭
充滿猶墻堵焉稽緇衣覽青史自摩騰入漢僧會遊吳瑞
法西來莫茲竝矣經云若未來世有諸國王建立正法護
三寶者我令五方菩薩往護其國令無災難又云五菩薩
自於佛前發宏誓言我有陀羅尼能加持擁護是一切佛
本所修行速疾之門若人得聞一經於耳所有罪障悉皆
消滅况復誦習而令通利佛卽讚言若有誦時此陀羅尼
者我乃十方諸佛悉常擁護諸惡鬼神敬之如佛不久當

得阿耨菩提則知此陀羅尼諸字母之根底眾瑜伽之數
澤茲實祕藏真詮者矣是以菩薩演之王者建之黎人念
之諸佛讚之俾其福而廣俾其利而大於斯傳者可以見
聖人之心也其功既妙利益隆深克念應時殊祥必降我
三藏譯貝多之文命良賁法師受從簡素觀行印持其道
場念誦儀修爲五門第以位次一一昭著庶無惜焉凡我
道俗將保厥躬同崇出世之因共踐菩提之路登仁壽域
者何莫由斯之道矣

良賁

良賁俗姓郭氏河中虞鄉人京師安國寺沙門永泰中勅令撰仁王護國經疏大厯十二年卒

奉勅造疏通經成進上表

學孤先哲有玷清流叨接翻傳謬膺筆受幸揚天闕親奉德音令於大明宮南桃園修疏贊演宸光曲照不容避席窮元珠於貝葉俱益慚惶捧白璧於丹墀寧勝報數仰酬皇澤俯課忠勤既竭愚誠庶照元造賁勤勤筆削三卷克成奏乞流行復上牋疏今年二月二十一日恩命令在內園修撰經疏微僧寡學懼不稱旨洗心滌慮扣寂求音發

明起自於天言加被仰憑於佛力咸約經論演暢真宗亦
猶集羣玉於崑山納大川於溟海火生於木與兩曜而俱
明識轉於如體一相而等照成道者法也載法者經也釋
經者疏也廣度羣有同於大通是菩提心如陛下意所撰
經疏繕寫畢功文過萬言部有三卷施行竊慚於愚見裁
成冀答於聖恩并念誦儀軌一卷承明殿講密嚴經對御
記一卷同進上輕塵元覽祇畏無任

辨才

辨才俗姓李氏襄陽人七歲依峴山寂禪師受經法年十

六出家本郡寺復就荊州玉泉寺納具就長安安國寺懷
威律師報恩寺義頒律師請業至德初宰臣杜鴻漸奏住
龍興寺加朔方管內教授大德大厯三年詔充章信寺大
厯十三年卒年五十六諡能覺仍賜紫

心師銘

咄哉此身爾生何爲資之以食覆之以衣處身以室病之
以醫百事將養一時不虧殊不知恩反生怨違四大互惱
五臟相欺此身無常一息別離此身不淨九孔常垂百千
癰疽一片薄皮此身可惡無貪惜之當使此身依法修持

三種淨觀十六思維一行不退安養西歸咸無上智是爲
心師

昔真

昔真大厯中林野沙門

佛頂尊勝陀羅尼幢銘

粵惟尊勝者佛也陀羅尼者法也敬知佛法高妙最勝最
尊四生不測其源三天罔觀其相勝妙無極將喻佛頂也
如來爲善住天主所說滅七返之深殃朽骨蒙霑息三塗
之苦壽自我法王韜逝滅跡金河後有天竺梵僧佛陀波

利是應真菩薩傳教東來至永淳二年重屆唐國聞奏大
帝天下流傳標幢相於長衢操銀鈎於金偈拂塵影者滅
罪恒沙况乎受持鐫題書寫大矣哉眾法之王妙矣哉人
天敬仰厥有信士黎城縣尉曹公委佛法不思議焉遂刻
記妙幢茲亡女之靈矣惟亡尼惠寂宿承靜命童真出家
學戒闕又未蒙進具稟靈梵網從政法王持誦維摩法華
以爲遊神之苑也後廣德二年十一月忽爲北狄浸凌南
奔雲騎朱旗闕電玉劍如霜揮霍目前潛身無暇惠寂因
恐墜井歿焉臻嘗收焚灰散諸寺嗚呼喪我法寶落我眼

光痛割吾心傷汝非命至大歷六年十月十四日招魂想
念建幢於縣西北堯山鄉遷座於六井古社壇之東左臨
大路敬崇畢矣其狀也玉柱楞層聳湧青蓮之上金鈴晃
曜璨垂化塔之傍內雕寶像之容外刻陀羅之呪平座鎮
勢雄之地峯珠輝大梵之天嗟乎逝川有舟夫何往而不
敏其詞曰

妙哉佛頂雄乎大聖夜壑明燈昏途寶鏡逝者乘兮靈光
所壽生兮清淨入佛刹歸真境黯玉質兮無形悲寶幢兮
有詠

乘如

乘如大厯中河南登封縣安國寺沙門

謝修戒壇表

伏奉十月十三日恩命於河南府登封縣嵩岳

闕三字

常建

戒壇兼抽

闕一字

律七僧灑埽謹律者湛恩自天袒荷無地

沙門乘如誠歡誠喜載欣載躍嵩者

闕二字

之

闕一字

戒者萬

行之首非

闕二字

岑

闕二字

詣茲希

闕一字

會善戒壇

闕四字

登其

封

闕一字

遺塵

闕二字

其受必

闕三字

比爲碩德

闕五字

毀觀者與

黍離之歎

闕二字

者增涕殞之悲陛下駐佛日之傾布堯雲

之澤抽僧灑埽設壇講律雷音永震更呼萬歲之

闕一字

聖

壽無疆彌極九天之峻不任載荷之至謹詣右銀臺門奉
表陳謝以聞沙門乘如誠歡誠喜謹言

景淨

景淨建中時大秦寺沙門

景教流行中國碑

粵若常然真寂先先而无元宵然靈虛後後而妙有摠元
樞而造化妙眾聖以元尊者其唯我三一妙身元元真主
阿羅訶歟判十字以定四方鼓元風而生二氣暗空易而

天地開日月運而晝夜作匠成萬物然立初人別賜良和
令鎮化海渾元之性虛而不盈素蕩之心本無希嗜泊乎
娑殫施妄鈿飾純精間平大於此是之中隙冥同於彼非
之內是以三百六十五種肩隨結轍競織法羅或指物以
託宗或空有以淪二或禱祀以邀福或伐善以矯人智慮
營營思情役役茫然無得煎迫轉燒積昧亡途久迷休復
於是我三一分身景尊彌陀訶戢隱真威同人出代神天
宣慶室女誕聖於大秦景宿告祥波斯覩耀以來貢圓廿
四聖有說之舊法理家國於大猷設三一淨風無言之新

教陶良用於正信制八境之度鍊塵成真啟三常之門開
生滅死懸景日以破暗府魔妄於是乎悉摧棹慈航以登
明宮含靈於是乎既濟能事斯畢亭午昇真經留廿七部
張元化以發靈關法浴水風滌浮華而潔虛白印持闕一字

字融四照以合無拘擊木震仁惠之音東禮趣生榮之路
存鬚所以有外行削頂所以無內情不畜臧獲均貴賤於
人不聚貨財亦罄遺於我齋以伏識而成戒以靜慎爲固
七時禮讚大庇存亡七日一薦洗心反素真常之道妙而
難名功用昭彰強稱景教惟道非聖不宏聖非道不大道

聖符契天下文明太宗文皇帝光華啟運明聖臨人大秦
國有上德曰阿羅本占青雲而載真經望風律以馳艱險
貞觀九祀至於長安帝使宰臣房公元齡摠仗西郊賓迎
入內翻經書殿問道禁闈深知正真特令傳授貞觀十有
二年秋七月詔曰道無常名聖無常體隨方設教密濟羣
生大秦國大德阿羅本遠將經像來獻上京詳其教旨元
妙無爲觀其元宗生成立委詞無繁說理有忘筌濟物利
人宜行天下所司卽於京義寧坊造大秦寺一所度僧廿
一人宗周德喪青駕西昇巨唐道光景風東扇旋令有司

將帝寫真轉模寺壁天姿汎彩英朗景門聖迹騰祥永輝
法界案西域圖記及漢魏史策大秦國南統珊瑚之海北
極眾寶之山西望仙境花林東接長風弱水其土出火浣
布返魂香明月珠夜光璧俗無寇盜人有樂康法非景不
行主非德不立土宇廣濶文物昌明高宗皇帝克恭纘祖
潤色真宗而於諸州各置景寺仍崇阿羅本爲鎮國大法
主法流十道國富元休寺滿百城家殷景福聖厯年釋子
用壯騰口於東周先天末下士大笑訕謗於西鎬有若僧
首羅含大德及烈竝金方貴緒物外高僧共振元綱俱維

絕紐元宗至道皇帝令寧國等五王親臨福宇建立壇場
法棟暫撓而更崇道石時傾而復正天寶初令大將軍高
力士送五聖寫真寺內安置賜絹百疋奉慶睿圖龍髯雖
遠弓劍可攀日角舒光天顏咫尺三載大秦國有僧佶和
瞻星向化望日朝尊詔僧羅含僧普論等一七人與大德
佶和於興慶宮修功德於是天題寺榜額載龍書寶裝璫
翠灼爍丹霞睿札宏空騰凌皦日寵賚比南山峻極沛澤
與東海齊深道無不可所可名聖無不作所作可述肅
宗文明皇帝於靈武等五郡重立景寺元善資而福祚開

大慶臨而皇業建代宗文武皇帝恢張聖運從事無爲每
於降誕之辰錫天香以告成功頌御饌以光景衆且乾以
美利故能廣生聖以體元故能亨毒我建中聖神文武皇
帝披八政以黜陟幽明闡九疇以維新景命化通元理祝
無愧心至於方大而虛專靜而恕廣慈救衆苦善貸被羣
生者我修行之大猷汲引之階漸也若使風雨順天下靜
人能理物能清存能昌歿能樂念生響應情發目誠者我
景力能事之功用也大施主金紫光祿大夫同朔方節度
副使試殿中監賜紫袞袞僧伊斯和而好惠聞道勤行遠

自王舍之城聿來中夏術高三代藝博十全始効節於丹
庭乃策名於玉帳中書令汾陽郡王郭公子儀初總戎於
朔方也肅宗俾之從邁雖見親於卧內不自異於行間爲
公爪牙作軍耳目能散祿賜不積於家獻臨恩之頗黎布
辭憩之金罍或仍其舊寺或重廣法堂崇飾廊宇如輦斯
飛更効景門依仁施利每歲集四寺僧徒虔事精供備諸
五旬餽者來而飯之寒者來而衣之病者療而起之死者
葬而安之清節達娑未聞斯美白衣景士今見其人願列
洪碑以揚休烈詞曰

眞主元元湛寂常然權輿匠化起地立天分身出代救度
無邊日昇暗滅咸證眞元赫赫文皇道冠前王乘時撥亂
乾廓坤張明明景教言歸我唐翻經建寺存歿舟航百福
偕作萬邦之康高宗纂祖更築精宇和宮敞朗遍滿中土
眞道宣明式封法主人有樂康物無災苦元宗啟聖克修
眞正御勝揚輝天書蔚映皇圖璀璨率土高敬庶績咸熙
人賴其慶肅宗來復天威引駕聖日舒晶祥風埽夜祚歸
王室被氛永謝止沸定塵造我區夏代宗孝義德合天地
開貸生成物資美利香以報功仁以作施暘谷來威月窟

畢萃建中統極聿修明德武肅四溟文清皇城燭臨人隱
鏡觀物色六合昭蘇百蠻取則道惟廣兮運惟密強名言
兮演三一主能作兮臣能述建豐碑兮頌元吉

至咸

至咸貞元中大聖善寺沙門

雲麾將軍河南府押衙張府君夫人上黨樊氏墓

誌銘

并序

代之所重曰名人之所寶曰位休禎奕葉昭德延祥其惟
張氏乎公諱銑隴右天水人也曾祖元植皇朝盧龍府折

衝祖定遠甘州司馬父崇正潭州長沙縣尉公卽長沙之
允子也幼而貞敏長而嚴毅歷職清貫皆著能綰兵權於
湖南總劇務於河府才當幹蠱京牧爪牙天不慙遺溘先
朝露以貞元十年八月廿日終於洛陽永泰里之私第春
秋六十九夫人樊氏曹州南華縣丞彥府君之息女蘊德
柔明言行端淑習禮筭總而從好逮鳳凰於飛和鳴霄漢
彼蒼不祐所天先逝撫訓孤幼孀迴纏哀妄疾遽嬰

闕一字

然怛化以貞元廿年四月十日終於家第享年五十有子
三人長曰叔重次曰叔威皆幼而敏惠年未弱冠相次天

喪季子叔齊泣血叩跼弔影長號惟家之艱克紹先烈有
女五人長女出家寧刹寺大德法號義性戒律貞明操行
高潔弟妹幼稚主家而嚴二女適京兆杜氏及禮而亡三
女適天水趙詡四女適安定梁祕五女在室而殞今孤子
孤女等哀號失容擗踊屠烈先遠有日龜筮協宜以永貞
元年十月廿日合而窆之雙棺同穴葬於平樂鄉朱陽原
禮也栽植松檟以標不朽爰託斯文旌乎厥美詞曰

於戲宦達兮英武雄名遂身歿兮弓劍空夫人淑慎兮相
次終哀哀嗣子兮泣蒼穹良辰宅兆兮安壽宮青山黯黯

今何人在白楊蕭蕭今多悲風

眞言

眞言貞元初沙門

大唐金剛般若石經記

有唐相國寺大德曰景融建金剛般若石經於大梁當唐
氏帝天下百六十有八祀貞元元年龍集乙丑皇帝拜南
郊之來月壬戌立於寺奉國報慈從昔願也夫先佛者法
法空則鏡證後佛者教教離則言亡雖至德而無形亦假
名而有後繇是脫靈之源流重華於漢土慧命之縣解載

頌於魯文融公宣之與慧命是矣公性惟明敏量秉淳固
生而好學幼則老成孝傳鄉黨名冠縉宿心堅不玷之玉
行滿上弦之月爲儒之龜鏡則在三之義全紹佛之弓冶
則第一之道立加有才高利用迹著通方掌僧有火光之
烈待客有泉水之稱不求虛飾外以浮榮異世同流聯芳
并美公以出塵而不爲宗之嗣毀服而不爲邦之史常追
昊天之報每蓄維桑之敬遭逢世故蕩溺兵間定亂之術
非孫吳不可問安之禮非荀趙不大君親之効我復何有
遂乃恭已懇志建言有謀以爲至聖無私會感必通正智

無情在幾必兆因疇遺訓厯考故實願欲寫誦章句潛融
觀照持三輪空成萬象印禍不却而自抑福不招而自剋
本無爲以寧家體淳化以建國則知刑賞之內權衡制之
刑賞之外我法綏之事無績而有忠功不伐而多義斷其
今古度以優劣苟折骨刺血於皮紙則節晉而難就欲垂
露懸針於竹素則工費而易朽所以徵藍田之美璞擬繁
昌之麗刻庶慙勞而永固與天長以地久於是月殿西次
雕楹南嚮四序光景六時香煙模可以廣千萬經觀可以
更億兆眾公與真言十年之長三紀之故假詞抒意難讓

課虛謝命含毫感事題記者也

潛真

潛真字義璋俗姓王氏太原人後徙爲夏縣朔方崇道鄉人開元二十六年住靈覺寺代宗朝預翻譯新經貞元四年卒於興善寺年七十一

新譯文殊師利菩薩佛刹莊嚴經疏奏

此經凡有三譯一西晉太熙中法護翻名佛土嚴淨經文勢多古語簡理幽二天后久視中實叉難陀於清禪寺翻名文殊受記經三卽今大曆六年所譯也伏惟寶應元聖

文武皇帝陛下天垂帝籙人歸寶圖德厚乾坤明侔日月
仁恕滋物夷狄仰德而輸誠慈惠利生正教承風而演化
頃者廊坊節度使兼御史中丞杜冕奏爲國請諸大乘經
明詔下於祇園梵旨開於貝葉因請三藏不空譯此經等
數十部續有勅下天下梵宇各置文殊菩薩像以旌聖功
也又詔以文殊菩薩爲上座皆三藏所請三藏學究瑜伽
解窮法印身口意業祕密修持戒定慧學顯通宣暢唐梵
文字聲韻具知傳譯此經善符聖旨文質相兼燦然可觀
潛眞識智愚昧學藝庸淺幸陪清衆謬在翻傳虛空藏經

課虛潤色猥蒙驅策述疏讚揚雖文義荒蕪已傳京邑今之所作蓋有由焉有金閣寺大德道超禪師學盡法源行契心本親覩靈境密承聖慈故久在清涼屬興淨業仍於現處建窣堵波尋覲法緣來詣京國以此經爲大事以大聖爲本師顯揚聖德無過此者乃稽首三藏誓傳大聖法門不以潛真庸虛轉祈和尚邀令述作和尚不念前之鄙陋又令讚釋此經竊難契真詮敢不盡其愚訥

良秀

良秀俗姓郭氏蒲津人幼出家中條山柏梯寺貞元四年

詔與罽賓國般若三藏譯經

奉勅造波羅蜜經疏進上表

去年十一月二十八日右街功德使王希遷奉宣令良秀等修撰新翻大乘理趣六波羅蜜經疏者伏聞至道同源聖人一貫大雄示相演妙音於獨園實位分身霑湛恩於雙闕開佛日於聖日降絲綸於法輪所以揚化慈航致人壽域不然豈得握真符而契合應休運以感通况以此經如來之密印羣生之度門得白馬之寶函啟青龍之祕藏是第一義理去筌蹄於最後乘說無分別加以天文煥發

睿思昭回眞如契心已闡微於釋氏般若製序諒續文於
太宗慈雲溥潤於太根湛露垂滋於貝葉良秀等材惟末
學性異生知謬寄討論伏增殞越上承嚴旨徒側管以窺
天虔奉本師懼升堂而鼓瑟所修撰疏一部謹附王希遷
隨表奉進伏乞聖慈許令同修疏沙門談筵於當寺讚演
及流布中外所冀落落眞言示丹青於新學明明像教流
粉釋於將來